



**TEKS UCAPAN
YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

**MAJLIS PERASMIAN DAN SAMBUTAN HARI STATISTIK NEGARA 2020,
HARI STATISTIK SEDUNIA 2020,
PERSIDANGAN STATISTIK MALAYSIA KE-7 (MYSTATS)**

**DEWAN ANGGERIK
JABATAN PERANGKAAN MALAYSIA**

20 OKTOBER 2020 (SELASA)

Salutasi

Bismillahirrahmanirrahim.

Yang dihormati saudara / saudari Pengacara Majlis

Yang Berbahagia Dato' Sri Dr. Mohd Uzir Mahidin
Ketua Perangkawan Malaysia

Yang Berbahagia Tan Sri / Datuk Seri / Datuk/ Pofessor/ Dr.; wakil media; serta
Tuan / Puan yang dihormati sekalian.

Assalamualaikum warahmatullahi wabarakatuh dan Salam Sejahtera,

Ucapan Aluan

1. Alhamdulillah, dengan izin Allah Subhana hu Wa Taa'la, kita masih mampu meraikan sambutan Hari Statistik Negara dan Hari Statistik Sedunia 2020 pada tahun ini di sebalik krisis kesihatan yang melanda. Dalam masa yang sama dengan norma baharu, kita turut mengadakan **Persidangan Statistik Malaysia (MyStats) Ke-7 dan melancarkan Buku Jabatan Perangkaan Malaysia 70 Tahun Penjana Statistik Negara secara maya.**
2. Terlebih dahulu, setinggi-tinggi terima kasih diucapkan kepada Jawatankuasa Penganjur atas sambutan hari yang amat bermakna kepada komuniti statistik di seluruh dunia.

SAMBUTAN HARI STATISTIK 2020

3. Tarikh 20 Oktober adalah hari penting bagi seluruh pengamal statistik negara sempena sambutan **Hari Statistik Negara**. Sambutan pada tahun ini sangat bermakna kerana ianya akan disambut bersekali dengan Hari Statistik Sedunia (*World Statistics Day*).
4. Pada tahun ini, sambutan di peringkat dunia bertemakan *Connecting The World With Data We Can Trust* yang memberi erti sebenar kepentingan data dan impaknya dalam kehidupan sejagat.
5. Bagi pengamal statistik seperti perangkawan, penggubal dasar, ahli akademik dan para penyelidik, tema ini menjadi **pendorong** untuk **pengumpulan data, penyusunan statistik serta penyediaan maklumat yang berkualiti** sebagai asas untuk membuat keputusan berasaskan bukti.
6. Dari pandangan masyarakat pula, tema ini memberi gambaran tentang bagaimana pentingnya **statistik sebagai ukuran penentuan hidup** yang lebih baik. Namun,

tema ini tidak membawa apa-apa kesan jika kita semua tidak memahami dan menghayati serta mengaplikasikannya dalam kehidupan seharian.

7. Sambutan Hari Statistik Negara pada tahun ini sedikit berbeza daripada tahun-tahun sebelumnya berikutan krisis kesihatan global kesan daripada wabak COVID-19. Meskipun sambutan dibuat secara maya, tidak seharusnya ia memudarkan semangat kita sebaliknya perlu menghayati sambutan dalam lensa kebiasaan baharu.
8. Dalam erti kata lain, ia wajar **dilihat dalam konteks keberhasilan profesion dan kepentingannya kepada masyarakat umum**. Kempen kesedaran statistik melalui media sosial turut dibuat dengan kerjasama *United Nation Development Programme* (UNDP).
9. Istimewanya, sambutan kali ini dibuat semasa negara sedang melaksanakan Banci Penduduk dan Perumahan 2020 dan semalam kita baru melancarkan 148 buah penerbitan My Local Stats yang memuatkan maklumat sosioekonomi peringkat daerah pentadbiran bagi manfaat kepada semua.

PENGUKUHAN SISTEM STATISTIK NEGARA

Tuan-tuan dan puan-puan

11. COVID-19 telah mengubah kehidupan manusia. Kita perlu hidup dalam Norma Baharu dan disiplin yang tinggi bagi memutuskan rangkaian jangkitan ini. Biarpun pandemik ini memberikan kesan yang buruk namun ada pengajaran buat kita semua. Daripada krisis ini, Kerajaan menyedari kepentingan data untuk merangka strategi khusus bagi memastikan kehidupan rakyat tidak terjejas dengan lebih teruk.
12. Data-data yang ada hari ini tidak kejut dan berada di merata-rata tempat. Kementerian dan agensi kerajaan pusat serta negeri, PBT dan syarikat milik kerajaan (GLC) mempunyai pangkalan data masing-masing yang berada dalam keadaan bersendirian (in silos). Agensi atau badan-badan ini tidak diselaraskan seperti dari segi metodologi, piawaian, konsep dan definisi dan sebagainya dalam pengumpulan data.

13. Data pentadbiran granular ini menjadi sumber data yang boleh digunakan oleh Kerajaan. Ini dapat mengurangkan kebergantungan kepada data primer yang dikumpul secara banci atau survei. Secara tidak langsung penggunaan data sekunder boleh mengurangkan kos dan penjimatan bagi pengumpulan data.

14. Justeru, sistem statistik negara perlu diperkukuhkan bagi memastikan data-data yang ada diselaraskan dan dapat digunakan oleh Kerajaan dalam merangka dasar atau membuat keputusan.

15. Pada 9 September lalu, jemaah Menteri telah bersetuju untuk memperkasakan sistem statistik negara. Pertama, Kabinet meluluskan penubuhan **Majlis Statistik dan Data Negara (MSDN)** sebagai badan penasihat tertinggi yang berperanan memberi hala tuju sistem statistik negara dan penyelarasan maklumat. Ini bersesuaian dengan keperluan membudayakan pembuatan keputusan berdasarkan fakta.

14. MSDN akan dipengerusikan oleh YAB Perdana Menteri dan disertai oleh beberapa menteri, wakil daripada kerajaan dan agensi swasta sebagai ahli jawatankuasa sekretariat.

14. Dalam masa sama, Kabinet turut bersetuju memberikan peranan yang lebih besar kepada Jabatan Perangkaan Malaysia (DOSM) sebagai **agensi pusat** dalam penyelarasan sistem statistik negara. DOSM akan bertanggungjawab membantu, menyelaraskan dan mengawal penghasilan statistik kementerian, jabatan dan agensi kerajaan.

15. Selaras dengan itu, **Chief Data Officer (CDO)** akan dilantik di peringkat kementerian, jabatan dan agensi di bawah kawal selia DOSM bagi membangunkan mekanisme yang sistematik untuk koordinasi, capaian dan kerjasama terhadap perkongsian data. CDO juga dapat membantu dalam pengumpulan dan penyusunan data tidak berstruktur termasuk data raya serta menjamin kerahsiaan maklumat. **Chief**

Management Office turut ditubuhkan bagi merangka strategi, menilai pencapaian dan pelaksanaan terhadap pelan pengukuhan sistem statistik negara.

16. Oleh yang demikian, Akta Perangkaan 1965 (Disemak 1989) akan **dipinda** selaras dengan pengukuhan yang akan dilaksanakan itu. Fungsi dan peranan DOSM akan diperkasakan melalui pindaan akta tersebut untuk meningkatkan kecekapan dan keberkesannya sebagai sebuah agensi statistik yang setanding dengan agensi statistik kebangsaan lain di negara-negara maju. Selain itu, perkara berkaitan penubuhan MSDN dan pelantikan CDO akan turut diperjelaskan dalam pindaan tersebut.

17. Kerajaan juga menyedari kepentingan analisis Data Raya dalam sektor awam ke arah penggubalan dasar yang lebih komprehensif dan tepat. Justeru, sebuah Pusat Analitik Data Raya Negara akan ditubuhkan dengan kerjasama antara DOSM, Unit Pemodenan Tadbiran dan Perancangan Pengurusan Malaysia (MAMPU) serta kementerian terlibat. Pusat ini bertujuan menyokong hasrat kerajaan dalam memastikan setiap perancangan dan pembuat keputusan berlandaskan analitis data selaras dengan inisiatif Kerajaan Digital.

18. Pelaksanaan Pengukuhan Sistem Statistik Negara akan memberikan impak positif antaranya menjamin ketersediaan data lebih komprehensif di sektor Kerajaan dalam merangka dasar jangka pendek dan jangka panjang negara. Di samping itu, ia turut bertujuan meningkatkan kepakaran analitikal berkaitan semua bidang ekonomi, sosial dan demografi dalam kalangan pegawai-pegawai di semua kementerian serta agensi.

19. Sebelum saya mengakhiri ucapan, sekali lagi saya ingin mengingatkan seluruh penduduk negara ini supaya menunaikan tanggungjawab untuk dibanci melalui **e-census**. Banci Penduduk dan Perumahan 2020 secara dalam talian telah dilanjutkan sehingga 21 Disember ini. Jangan tunggu sehingga saat akhir untuk mengisi borang banci. Lakukan sekarang kerana data anda adalah masa depan kita.

20. Saya ucap terima kasih dan setinggi-tinggi penghargaan kepada seluruh warga DOSM di atas sumbangan yang diberikan. Statistik yang disediakan telah membantu kerajaan dalam merangka pelbagai perancangan khususnya ketika berhadapan dengan krisis. Pakej Rangsangan Prihatin Rakyat (PRIHATIN), PRIHATIN Tambahan PKS, Pelan Jana Semula Ekonomi (PENJANA) dan Inisiatif Tambahan Khas : Kita Prihatin telah menunjukkan hasil.

21. Kini, data-data ini juga amat penting untuk Unit Perancang Ekonomi, Jabatan Perdana Menteri dalam menyiapkan Rancangan Malaysia Ke-12 (RMKe-12). Insya Allah pelan 5 tahun ini akan dibentangkan di Parlimen pada awal tahun depan.

22. Akhir kata, dengan lafaz **Bismillah hir rahman nir rahim, saya merasmikan Hari Statistik Negara 2020, Hari Statistik Sedunia 2020 dan Persidangan Statistik Malaysia (MyStats) Ke-7 serta melancarkan Buku Jabatan Perangkaan Malaysia 70 Tahun Penjana Statistik Negara.** Selamat Hari Statistik Negara untuk semua rakyat Malaysia!

Sekian, Wabillahi al-taufik walhidayah wassalamu'alaikum wa rahmatullahi wa barakatuh.